

Sofonías

*Nopa tonali quema ajsis ihueyi cualancayo
Totecó*

¹ Ya ni nopa camanali catli TOTECO nechmacac ni Sofonías, na niicone Cusi, huan niiixhui Gedalías, huan niiompacá ixhui Amariás catli elqui iconé Ezequías catli huejcajya itztoya. TOTECO nechmacac ni camanali quema Josías, iconé Amón, eliyaya tlanaahuatijquetl ipan tlali Judá.

² Quej ni quijtohua TOTECO: “Niquixpolihuiltis nochí tlamantli catli onca ipan ni tlaltipactli.

³ Niquinixpolihuiltis masehualme huan nochí tlapiyalme. Niquinixpolihuiltis totome catli patlantinemij ipan ilhuicac huan nopa michime catli itztoque ipan atl. Nochi amo cuajcualme niquintlahuisos huan niquintlamiaxpolihuiltis masehualme tlen ni tlaltipactli.” Quej nopa quijtohua TOTECO.

⁴ “Niquintlatzacuiltis nochí masehualme ipan tlali Judá huan nochí ipan altepetl Jerusalén. Niquinsosolos nochí tlaixcopincayome tlen Baal huan nochí catli quinhueyichihuaj. Nochi totajtzitzi catli quintequipanohuayayaj tiotzitzi niquinixpolihuiltis huan ayacmo aqui quinelnamiquis. ⁵ Nojquiya niquinixpolihuiltis injuanti catli tlejcoj inincalpani huan motlancuaquetzaj para quihueyichihuase tonati, metztli huan sitlalime. Niquinmictis nochí catli quijtohuaj nechhueyichihuaj na, pero

nojquiya quihueyichihuaj nopa tiotzi Milcom.
⁶ Nojquiya niquinixpolihuiltis inijuanti catli
 achtihuiya nechhueyichihuayayaj na catli
 niininTECO, pero ama mohuejcatlalijtoque tlen
 na. Ayacmo quitemhuaq catli nopaquilis, niyon
 nechtlajtlaníaj ma niquintiochihua.”

⁷ Xijtlepanitaca huan xiquimacasica TOTECO. Amo ximolini iixpa. Ya monechcahuía itonal TOTECO, nopa tonal quema yaya tetlatzacuiltis. Yaya ya quicualtlalijtoc para quichihuas se tlacajcahualistli huan elis imasehualhua catli miquise. Ya quinnotztoc catli hualase quinmictiquij. ⁸ TOTECO quiijtohua: “Ipan nopa tonali quema nitetlajtolsencahuas, niquintlatzacuiltis nochí itlapalehuijcahua nopa tlanahuatijquetl huan nochí iconehua huan nochí catli moyoyontíaj quen nopa masehualme tlen sequinoc tlalme. ⁹ Nojquiya niquintlatzacuiltis inijuanti catli amo quinequij ipan moquetzase caltencuahuitl pampa quintlepanitaj tiotzitzí. Huan niquintlatzacuiltis catli tecajcayahua huan tetlachtequilíaj para quitemitise ininchaj intiotzitzí ica tlamantli tlachtectli. Teipa quitemitíaj ichajchaj inintecohua ica catli tlachtectli.” ¹⁰ Nojquiya TOTECO quiijtohua: “Ipan nopa tonali chicahuac tzajtzise nopa masehualme catli itztoque campa hueli ipan altepetl Jerusalén. Tzajtzise tlen nopa puerta catli itoca Michi hasta campa nopa colonia catli yancuic. Huan caquistis chicahuac quema huelonis nopa tlaixtlejcolis. ¹¹ Huajca xiayijtica nochí anmasehualme ipan nopa colonia campa tianquis pampa nochí tlanemacani huan nochí

catli anmechtlanejtiyayaj tomi ya mijque.

¹² “Ipan nopa tonali nijtequihuis se tlahuili ipan altepetl Jerusalén huan niquintemos hasta niquinpantis nochí masehualme catli pajca mosiyajquetztoque ipan tlajtlacoli. Nochi niquintlatzacuiltis pampa quiijtohuayaya:j TOTECO amo tleno techchihuilis. Amo techchihuilis catli cuali, niyon catli amo cuali.”

¹³ Yeca inincualancaitacahua quinichtequilise nochí catli quipixtoque, huan ininchajchaj quinsosolhuilise. Masque mochantise, amo huelis itztose nopona huan masque quitocase xocomecatl, amo huelis quiijise iayo.

¹⁴ “Nechcatitoc nopa tonal quema niininTECO nitetlajtolsencahuas. Quena, tlahuel nimantzi monechcahuijtihuala quema nitetlatzacuiltis. Nelfiero elis nopa tonal hasta tlacame catli más motemacaj chocase huan tlahuejchihuase.

¹⁵ Ipan tonal nesis quenicatza niininTECO ninelcualantoc huan nochí majmahuise huan ayacmo quimatise tlaque quichihuase, san motlamipasolose. Huan quema tlamic nopa tlasosololistli, ayacmo tleno mocahuas. Elis se tonali tlen tequipacholi huan tlaohuijcayotl. Elis se tonal quema tlamixtentos huan tzintlayohuiyas. ¹⁶ Ipan nopa tonali molinis tlapitzali huan miyac tzajtzise pampa sosolihuis inintepa nopa altepeme catli moyahualojtoque. Huan huetzise nopa huejcapantique torres campa tlachiyayayaj huejca para tlamocuitlahuise.

¹⁷ “Niquintlaijijyohuilitis nopa masehualme huan nemise quen popoyotzitzí pampa tlajtlacolchijque ica na niininTECO. Inieso

mosemanas campa hueli quen quema mosemana tlaltejpoctli, huan ininnacayo palanis quen cuitlatl.”

¹⁸ Ipan nopa tonal niyon ininplata tomi, niyon inioro tomi amo huelis quinmanahuis tlen ihueyi cualancayo TOTECO pampa nochí tlali tlamitlatlas ica nocualancayo. Huan nochí masehualme ipan tlaltipactli polihuise ica se tlatoctzi.

2

Nopa tonal quema TOTECO quintlatzacuiltis nochí tlalme

¹ Ximosentilica huan ximoilhuica quenicatza anitztoque catli amo anpinahuaj iixpa TOTECO.

² Xijchihuaca amantzi. Amo xijcahuilica ma pano tonali quen tlajsoli catli quihuica ajacatl. Amo xijchiyaca hasta ajsis nopa tonal catli niquijtojtoc hualas quema TOTECO tlahuel cualanis amohuaya huan amopan ajsis ihueyi cualancayo.

³ Xijtemoca TOTECO nochí amojuanti catli anteicneltzitzti ipan ni tlaltipactli huan amojuanti catli anquichihuaj catli quiijtohua itlanahuatilhua. Xijchihuaca catli xitlahuac huan ximoicnonequica pampa quej nopa huelis anmomanahuise quema TOTECO tetlatzacuiltis ica nochí icualancayo.

TOTECO quintelhuía filisteos

⁴ Ipan inintla nopa filisteos nopa altepeme Gaza, Ascalón huan Asdod mocahuase nochí sosoltic. Quitlamitlachtequilise huan catli nopona ehuani quintlamii xpolihuile. ⁵ Nelfiero elis para amojuanti ancereteo masehualme catli anitztoque iteno hueyi atl ipan tlali

Canaán pampa TOTECO anmechtlajtolsencahuas. TOTECO anmechtzontlamiltis nochí catli anitztoque ipan nopa tlali tlen nopa filisteos huan amo aquí mocahuas.⁶ Nopa tlali catli eltoc nechca hueyatł elis se sacamili. Nopona mosentilise tlamocuitlahuiani tlen borregojme huan quichihuase tlatzactli para ininborregojhua.

⁷ Huan nopa tlali Judá ehuani catli noja mocahuase yoltoque moaxcatise nopa tlali huan nopona tlacuase ininborregojhua. Ica tlayohua cochise ipan nopa calme catli eltoc ipan Ascalón pampa TOTECO ininDios hualas quinpaxaloqui imasehualhua huan quinquixtis tlen campa tequipanotoj ipan tlalme catli huejca.

TOTECO quintlatzacuiltis moabitame huan amonitame

⁸ Yaya quiijtohua: “Na nijcactoc quenicatza nopa moabitame huan amonitame quintlaijilhuijtoque nomasehualhua. Quinpinajtijtoque huan quincuiljtoque intatlal.”⁹ Quej ni quiijtohua TOTECO Catli Quinyacana Itequihuajcahua Ma Tlatlanitij yaya catli ininDios israelitame: “Nimotestigojquetza ica na noseltzi huan niquipijtohua para niquinixpolihuiltis nochí ipan tlali Moab huan Amón quen nijchijqui ica altepeme Sodoma huan Gomorra huejcayja. Ipan Moab huan Amón san oncas tejzonquiltil huan miyac istatl. Sosolijtos para nochipa. Huan noisraelita masehualhua catli noja mocahuase yoltoque ipan nopa tonali calaquise para moaxcatise nopa tlalme.”¹⁰ Quej nopa ininpantis Moab

huan Amón pampa mohueyimatque, huan quintlajilhuijque huan quinhuetzquilijque imasehualhua TOTECO Catli Quinyacana Itequihuajcahua Ma Tlatlanitij. ¹¹ TOTECO quinchihuilis catli fiero huan nelía tlahuel quinmajmatis. Quinxpolihuiltis nochí tiotzitzí catli quinhueyichihuaj ipan nopa tlalme. Quej nopa nochí tlalme ipan tlaltipactli quihueyichihuase TOTECO. Sesen quihueyichihuas ipan ya itlá.

TOTECO quitlatzacuiltis Etiopía huan Asiria

¹² Huan TOTECO quijtohua: “Huan amojuanti tlen tlali Etiopía nojquiya nimechtzontlamiltis ica nomachete.” ¹³ Ica ihueyi chicahualis TOTECO nojquiya quintlatzacuiltis nopa tlalme catli mopantíaj ica norte. Quitlatzacuiltis tlali Asiria huan ihueyi altepe, Nínive, quicahuas sosolijtoc quen se huactoc tlali campa amo tleno onca. ¹⁴ Nopona mosiyajquetzase borregojme huan miyac tlamantli tlapiyalme catli campa hueli hualase quipiyase ininchaj nepa. Miyac tlamantli cuamojmojme cochise ipan nopa tlaquetzalme tlen nopa caltlanahuatilme catli achtihui eltoyaj yejyectzitzí. Tzopilome itztose ipan ininventanas huan ipan ininpertas san oncas miyac tlajsoli. Huan nochí cuatetomítl tlen tiocuahuitl mocahuas tlanemijya.

¹⁵ Quej ni ipantic nopa altepetl catli san pactoya huan catli eltoyá temachtli. Nopona nochí mohueyimatiyayaj ipan ininyolo huan quijtohuayayaj: “Ipan nochí tlaltipactli amo onca seyoc altepetl catli tlahuel cuali quen ni.” Pero ama xiquitaca quenicatza mocajqui tlasosololi

huan mochijqui ininchaj tlapiyalme. Nochi catli panose nopona san quihuetzquilise huan quiojolinise inintzonco para quipinajtise.

3

Itlajtlacol Jerusalén huan quenicatza Toteco quimanahuis

¹ Nelfiero elis para altepetl Jerusalén. Nemosisinijtoque catli ehuaj nopona. Ayacmo tlapajpactique iixpa TOTECO por inintlajtlacolhua. Tlahuel tetlaijiyohuiltíaj quen quinequij. ² Catli nopona itztoque amo quitlacaquilíaj TOTECO ica-manal quema quinilhuía catli monequi quichihuase. Amo quema quinequij quichihuase catli xitlahuac. Amo motemachíaj ipan TOTECO yaya catli ininDios, niyon amo quitemohuaj.

³ Itlayacancahua nopa altepetl itztoque quen leones catli san nanalcatoque huan quichiyaj ajqueya huelis quiitzquise. Ijueces itztoque quen lobos catli nemij tlayohua para quimasiltise huan quitlamicuase nochí catli quiitzquise hasta niyon se iomiyo amo mocahuas para ijnaloc. ⁴ Catli motocaxtíaj tlajtol pannextiani nopona senquistoc tlacajcayahuaj huan mojjixpatlaj. Totajtzitzi nopona quijtlacohuaj nochí tlamantli catli tlatzeloltic huan quiixpanoj itlanahuatil TOTECO.

⁵ Pero TOTECO itztoc ipan Jerusalén huan yaya quichihua catli xitlahuac. Amo tleno catli amo cuali quichihua. Mojmostla quinextía para xitlahuac nochí catli quiijtohua huan quichihua. Huan nochipa nochime hueli quimatiíj catli xitlahuac. Pero amo aqui quichihuilá cuenta. Amo

cuajcualme, nopona niyon amo mopinahuaj ica catli quichihuaj.

⁶ TOTECO quiijtohua: “Niquinixpolihuitlijtoc miyac tlalme huan ininmasehualhua. Nochi calme nopona mocajque sosolijtoque huan inincalles mocajque tlatzitzicatoc. Inialtepehua tlamisosolijtoc hasta ayacmo mocajqui niyon se masehuali. ⁷ Huan niquijto para ama quena, nechimacasise huan nechtlacaqilise quema niquintlacahualtis. Huan quej nopa ayacmo monequis niquintlatzacuiltis sempa quen achtiluiya. Pero amo moyolcuepque. Inijuanti noja más pejqui quichihuaj catli fiero.” ⁸ Huajca ama TOTECO quiijtohua: “Xipiyaca amoyolo huan techchiyaca hasta nopa tonal quema na nimoquetzas para niquintlajtolsencahuas. Pampa na ya nijtlalijtoc quema niquinseñitis nochí tlalme ehuani huan nochí inintlanahuatiyahua huan ininpan nijtoyahuas nohueyi cualancayo. Huan nocualancayo elis quen se tlitl catli quintlamitlatis nochí ipan tlaltipactli.

⁹ “Ipan nopa tonali na niquinpajpaquilis inincamac nochí masehualme huan nochí inijuanti sentic huelise nechhueyichihuase, niininTECO, ica san se ininyolo. ¹⁰ Nochi nomasehualhua catli mosemantoque campa hueli hasta ipan seyoc nali tlen nopa hueyame tlen tlali Etiopía nechtlatlanise para sempa ma nieli inintECO huan hualase para nechmacase inintlacajcahuialis. ¹¹ Huan ipan nopa tonal ayacmo anquipanose pinahualistli por nochí nopa fiero tlamatli catli ica antechixpanoque

pampa ipan nopa tonali ayacmo anmosisinise ica na. Huan niquinijcuinis tlen campa amojuanti nochí masehualme catli mohueyimati huan motlepanitaj, huan quej nopa ayacmo aqui mohueyimatis ipan notepe catli tlatzejzelotic.

¹² Huan tlen amojuanti niquincahuas ma mocahuaca yoltoque se quesqui masehualme catli teicneltzitz huan catli moicnonequij pampa inijuanti catli más nimantzi motemachíaj ipan na, niamotECO. ¹³ Huan nopa masehualme catli mocahuase yoltoque amo quichihuase tlamantli catli amo cuali, amo istlacatise, niyon amo tlacajcayahuase. Nopona tlacuase huan cochise ica tlasehuilistli, huan amo aqui quintemajmatis.”

¹⁴ Xihuicaca amojuanti catli anitztoque ipan altepetl Sion. Xitzajtzica ica paquelistli nochí anisraelitame. Ximopaquilmismacaca ica nochí amoyolo nochí ipan altepetl Jerusalén. ¹⁵ Pampa TOTECO ayacmo más anmechtlatzacultis huan yaya quinquixtis nochí amocualancaitacahua. Huan TOTECO iseltzi itztos amohuaya, yaya catli Tlanahuatijquetl ipan tlali Israel. Huan huajca ayacmo quema anquitätase catli amo cuali.

¹⁶ Ipan nopa tonali masehualme quinilhui se Jerusalén ehuani: “Amo ximajmahuica amojuanti ipan altepetl Sion, niyon amo ximahuihuipicaca.

¹⁷ Pampa TOTECO catli quipyia nochí chicahualistli hualajtoc para itztos amohuaya. Yaya anmechmaquixtis. Yaya nelía yolpaquis ica amojuanti. Anmechyoltalis ica iteicnelijcayo huan por amojuanti, huicas ica miyac paquelistli.”

¹⁸ Huan TOTECO quiijtohua: “Nimechsentilis amojuanti catli anmotequipachohuaj pampa amo

hueliyaya anmosentilise ipan nopa tlasentililistli catli tlatzejzelotique huan ayacmo aqui anmechpinahualtis sempa. ¹⁹ Ipan nopa tonal na niquintlatzacuiltis catli mitztlajiyohuiltyayaj. Niquinmaquixtis nomasehualhua catli amo quipiyaj chicahualistli huan catli amo hueli momanahuise ininseltzitzi. Niquinquixtis nomasehualhua catli tetequipanoyayaj ipan nochi tlalme huan niquinhuilicas. Huan niquinhueyitlalis huan quipiyase tlatlepanitacayotl ipan nochi tlaltipactli.

²⁰ “Ipan nopa tonal na nimechsentilis huan nimechhualicas ipan amotlal. Huan nimechmacas seyoc amotoca. Nimechhueyitlalis huan nochi tlalme ipan tlaltipactli anmechtlepanitase. Ica amoixteyol anquiitase para sempa nimechcualtlalis huan sempa nimechmacas nochi catli anquipiyayayaj.” Quej nopa quiijto TOTECO.

**Icamanal toteco; Santa Bíblia
Bible without Deuterocanon in Nahuatl, Huasteca
Occidental (MX:nhw:Nahuatl, Huasteca Occidental)**

copyright © 2005 Wycliffe Bible Translators, Inc.

Language: Nahuatl, Huasteca Occidental

Translation by: Wycliffe Bible Translators, Inc.

Náhuatl, Huasteca Occidental [nhw], Mexico

Copyright Information

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Huasteca Occidental

© 2005, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
0d0cfbfa-2c44-59e4-b00b-2ef5eb44b02d